

[Wittenberg], 7. Dezember 1572

Von Caspar Peucer

Druck: Brahe, Progymnasmata S. 535; Brahe, Opera omnia, Bd. 3, S. 49f.  
 Regest: Keil/Zäh, Aufenthalt S. 79; Keil/Zäh, Beziehungen S. 176f.

CLARISSIMO DOCTRINA ET VIRTUTE VIRO, DOMINO HIERONYMO WOLPHIO  
 RECTORI STVDIORVM PVBLICORVM IN INCLYTA AUGUSTA, AMICO SUO  
 COLENDΟ. S. D.

QVIBUS nuper tuis respondi, eas te accepisse spero. Has ut submitterem, fecit Nouum et insolitum Sidus, quod in Septimanam quartam sub Asterismo Cassiopeae conspicamur haerere, uno in loco Fixum, et Lumine Stellae similiimum, sed puritate Lucis, Splendoreque radiante, Vibratu et Magnitudine, quoad uisum, cunctis tam Errantibus quam Inerrantibus nitidius, Venere excepta. Id Scintillatu, qui Altitudinis et distantiae magnae Argumentum est, a Planetis, et situ ipso extra Zodiacum, tum quod Fixarum instar, nullo alio, quam primi motus circumactu conuertitur, sese separat. Fixis annumerari nequit, nisi Stellam Nouam esse affirmemus, cum in hac Coeli parte, nullis unquam Seculis talis uisa sit. Explorauimus motum et situm eius, Organis Astronomicis accurate, ac locum uisum in sextam partem 8 incidere, cumque ad summum Coeli peruenit culmen, a uertice non plus 10 part[es] 4 scrup[ula] distare deprehendimus, neque ad Horizontem accedere propius, quam ad interuallum 23 part[es] 33 scrup[ula]. Sed collatis Obseruationibus omnibus, discrimin inter uerum et apparentem locum hactenus nullum, et idcirco Parallaxin nullam reperimus. Iudicamus Cometen esse, idque affirmaremus certo, si de Altitudine explorate constaret. Cumque nitore luminis et specie Iouem exprimat, ab hoc accensum esse conijcimus, qui cum ante biduum, mutato cursu rursus progredi caeperit, attendemus an Sidus hoc suo eum motu proprio secuturum sit. Omnino fatale aliquid huic postremae aetati portendi iudico. Cum autem et te sciam diligenter contemplari Coelum, et ostenta talia maxime curae esse nostro Cypriano, amanter oro, quantum uobis fuerit compertum atque peruestigatum, ad me ut scribatis. Bene et foeliciter Vale, 7 Decembris, Anno 1572.

D. CASPARVS PEVCERVS.